

**Bosna i Hercegovina  
Federacija Bosne i Hercegovine  
Zeničko-dobojski kanton  
OPĆINA VAREŠ  
OPĆINSKO VIJEĆE**



**Broj: 01 - 48/11  
Vareš, 24.02.2011. godine**

Na osnovu člana 11. Zakona o ugostiteljskoj djelatnosti ("Službene novine Federacije BiH", broj:32/09), člana 14. Zakona o turističkoj djelatnosti ("Službene novine Federacije BiH", broj: 32/09), člana 41. Zakona o obrtu i srodnim djelatnostima ("Službene novine Federacije BiH", broj: 35/09), člana 9. Zakona o trgovini ("Službene novine Federacije BiH", broj 2/95) i člana 22. tačka 2. Statuta općine Vareš, broj: 01-25/09, od 29.01.2009. godine, Općinsko vijeće Vareš na 26. sjednici održanoj 24.02. 2011. godine, **donosi:**

## **ODLUKU O RADNOM VREMENU U ODREĐENIM DJELATNOSTIMA**

### **I OPĆE ODREDBE**

#### **Član 1.**

Ovom Odlukom utvrđuje se radno vrijeme, početak i završetak radnog vremena u oblasti prometa roba na malo, ugostiteljstva, obrtništva i srodnih djelatnosti.

Odredbe iz stava 1. ovog člana odnose se na pravna i fizička lica koja obavljaju navedene djelatnosti putem svojih trgovinskih, obrtničkih i ugostiteljskih radnji, agencija, poslovnih jedinica, radionica i sličnih prostora koji se nalaze na području općine Vareš.

#### **Član 2.**

Odredbe ove Odluke se ne primjenjuju na poslovne jedinice i radnje koje pružaju ugostiteljske usluge uposlenim u preduzećima, organizacijama, udruženjima i ustanovama.

#### **Član 3.**

Radno vrijeme za trgovine, obrtničke i srodne djelatnosti, može se odrediti od 06.00 sati do 22.00 sata u ljetnom periodu računanja vremena odnosno od 06.00 sati do 21.00 sati u zimskom periodu računanja vremena.

Izuzetno za maloprodajne objekte u oblasti trgovine - vrste apoteka, benzinske pumpe, radno vrijeme može trajati od 00.00 do 24.00 sata.

#### **Član 4.**

Ugostiteljskim objektima u smislu ove Odluke, smatraju se svi ugostiteljski objekti koji su registrirani za pružanje ugostiteljskih usluga u skladu sa Zakonom o ugostiteljskoj djelatnosti, Zakona o turističkoj djelatnosti i Pravilnika o razvrstavanju, minimalnim uvjetima i kategorizaciji ugostiteljskih objekata.

#### **Član 5.**

U zimskom periodu računanja vremena ugostiteljskim objektima određuje se završetak radnog vremena do 23.00 sata, a u ljetnom periodu računanja vremena određuje se završetak radnog vremena do 24.00 sata.

Izuzetno, na pismeni zahtjev vlasnika ugostiteljskog objekta može se odobriti duže radno vrijeme.

Odobrenje iz prethodnog stava ovog člana donosi načelnik općine.

## **Član 6.**

Obavijest o radnom vremenu mora se istaći na vidnom mjestu na ulazu u poslovne prostorije.

## **II MINIMALNO RADNO VRIJEME TRGOVINSKIH RADNJI**

### **Član 7.**

Radna sedmica trgovinskih radnji u kojima se vrši promet robe na malo ne može biti kraća od šest radnih dana.

Minimalno radno vrijeme trgovinskih radnji iz prethodnog stava u toku dana ne može biti kraće od sedam sati.

Izuzetno, od odredbe prethodnog stava, trgovinske radnje neprehrambenih proizvoda mogu jedan dan u sedmici imati minimalno radno vrijeme u trajanju od 07.00 sati do 15.00 sati.

## **III MINIMALNO RADNO VRIJEME UGOSTITELJSKIH I TURISTIČKIH OBJEKATA**

### **Član 8.**

Radna sedmica ugostiteljskih objekata osim objekata iz skupine "barovi" ne može biti kraća od šest radnih dana.

Pravna i fizička lica iz prethodnog stava mogu da rade svaki dan uključujući i dane državnih praznika najmanje 7 sati.

### **Član 9.**

Ugostiteljski objekti za smještaj gostiju moraju biti otvoreni neprekidno od 0 do 24 sata svaki dan.

### **Član 10.**

Turističke agencije i njihove poslovne jedinice koje imaju organiziranu informativnu službu mogu biti otvorene svaki dan.

## **IV MINIMALNO RADNO VRIJEME OBRtničkih I SRODNIH DJELATNOSTI**

### **Član 11.**

Objekti u kojima se vrši obrtnička i srodne djelatnosti moraju biti otvorene svakim radnim danom najmanje 7 sati.

### **Član 12.**

Obrtnički objekti za proizvodnju i prodaju pekarske, poslastičarske i cvjećarske struke mogu biti otvoreni i nedjeljom najmanje tri sata prije podne tokom cijele godine.

## **V OGRANIČAVANJE RADNOG VREMENA**

### **Član 13.**

U dane državnih i vjerskih praznika, maturalnih zabava, svadbi, može se izuzetno odobriti duže radno vrijeme od propisanog, a rješenje donosi načelnik općine.

### **Član 14.**

Kriteriji za duže radno vrijeme od propisanog su:

- da ugostitelj posjeduje odobrenje za rad od nadležne općinske Službe,

- da se u ugostiteljskom objektu i u neposrednoj blizini ugostiteljskog objekta ne narušava javni red i mir i
- da uredno i na vrijeme izvršava svoje zakonske obaveze.

#### **Član 15.**

Ako se vršenjem ugostiteljske, obrtničke, srodne i druge djelatnosti uznemiravaju građani koji rade ili stanuju u susjedstvu (najmanje 51% članova zajednice etažnih vlasnika), Općinski načelnik, putem nadležne službe po prethodno pribavljenom mišljenju nadležne inspekcije, može ograničiti rad u objektu do 22.00 sata i o tome obavijestiti policijsku stanicu.

Zahtjev za pokretanje postupka za ograničenjem vremena iz stava 1. ovog člana, može podnijeti savjet mjesne zajednice na inicijativu građana.

#### **Član 16.**

Pravno i fizičko lice kome je ograničeno radno vrijeme može pokrenuti postupak za ukidanje ograničenja radnog vremena nakon proteka roka od najmanje 3 mjeseca po pravosnažnosti rješenja o ograničenju radnog vremena.

Prilikom odlučivanja o zahtjevu iz prethodnog stava ovog člana, potrebno je o istom zatražiti mišljenje nadležne inspekcije i savjeta mjesne zajednice.

#### **Član 17.**

Trgovinske i ugostiteljske usluge koje se povremeno pružaju izvan objekata – sajam, vašar, teferič, muzički koncerti i doček Nove godine na otvorenom mogu se pružati u okviru radnog vremena tih manifestacija.

### **VI KAZNENE ODREDBE**

#### **Član 18.**

Novčanom kaznom od 500,00KM do 5.000,00KM kaznit će se za prekršaj vlasnik trgovačke radnje, ako

1. se ne pridržava utvrđenog radnog vremena,
2. ako na uočljiv način ne istakne radno vrijeme,

Za radnju iz stava 1. ovog člana kaznit će se za prekršaj i zaposleni radnik-uposlenik u iznosu od 100,00KM do 1.000,00KM (čl.57., tačka 4. i 9. Zakona o trgovini; Sl. novine FBiH, br: 2/95 i 19/96).

#### **Član 19.**

Novčanom kaznom od 500,00KM do 1.000,00KM kaznit će se za prekršaj imalac radnje-obrtnik ili lice koje obavlja srodnu djelatnost, ako

1. se ne pridržava utvrđenog radnog vremena,
2. ako na uočljiv način ne istakne radno vrijeme, (čl.112. st.1. tačka g. Zakona o obrtu i srodnim djelatnostima; Sl. novine FBiH, br:35/09).

#### **Član 20.**

Novčanom kaznom od 500KM do 5.000KM kaznit će se za prekršaj pravno lice koje obavlja ugostiteljsku i turističku djelatnost,

1. ako se ne pridržava utvrđenog radnog vremena,
2. ako na uočljiv način ne istakne radno vrijeme.

Za prekršaj iz stava 1. ovog člana kaznit će se i odgovorno lice novčanom kaznom od 200,00KM do 2.000,00KM.

Za prekršaje iz stava 1. ovog člana kaznit će se fizičko lice koje obavlja ugostiteljsku djelatnost i vođa turističke poslovnice novčanom kaznom u iznosu od 150,00KM do 1.500,00KM (čl.66. st.1. tačka 2. Zakona o ugostiteljskoj djelatnosti, Sl. novine FBiH, br: 32/09).

Ukoliko se prekršaj iz člana 20. tačka 1. i 2. ponovi u roku od 12 mjeseci, pravno lice će se kazniti novčanom kaznom od 1.000 do 5.000 KM.

Ukoliko se prekršaj iz člana 20. st.2. ponovi u roku od 12 mjeseci, fizičko lice će se kazniti novčanom kaznom od 300 do 1.500 KM.

## **VII NADZOR**

### **Član 21.**

Nadzor nad sprovođenjem ove odluke vrši kantonalni organ uprave nadležan za poslove turističko-ugostiteljske inspekcije i tržišne inspekcije.

Podnošenje zahtjeva za pokretanje prekršajnog postupka vrše kantonalne inspeksijske službe samostalno i po obavijesti Policijske stanice.

## **VIII PRIJELAZNE I ZAVRŠNE ODREDBE**

### **Član 22.**

Pravne i fizičke osobe dužne su da svoje radno vrijeme usklade sa odredbama ove Odluke u roku od 30 dana od dana njenog stupanja na snagu.

### **Član 23.**

Stupanjem na snagu ove Odluke prestaje da važi Odluka o radnom vremenu ugostiteljskih, trgovinskih i zanatskih djelatnosti, br: 01-76/98, od 05.09.1998. godine.

### **Član 24.**

Ova Odluka stupa na snagu osmog dana od dana objavljivanja na oglasnoj tabli Općine Vareš.

**PREDSJEDAVAJUĆI  
OPĆINSKOG VIJEĆA**

Josip Malbašić

Odluka objavljena na oglasnoj tabli Općine Vareš, dana 25.02.2011. godine.

**OPĆINSKI NAČELNIK**

Hamdo Fatić

## **O b r a z l o ž e n j e**

Na 24. sjednici Općinskog vijeća Vareš, održanoj 29.12.2010. godine, između ostalih, usvojen je Zaključak da se do kraja februara 2011. godine pripremi Prijedlog Odluke o izmjeni Odluke o obaveznom radnom vremenu ugostiteljskih, trgovinskih i zanatskih djelatnosti.

Dosadašnja Odluka o radnom vremenu ugostiteljskih, trgovinskih i zanatskih djelatnosti donesena je 1998. godine. U međuvremenu su doneseni novi zakoni koji regulišu oblast ugostiteljstva, turizma, trgovine, te Zakon o obrtu i srodnim djelatnostima, promijenjene su i kaznene odredbe, pa se s tim ciljem donosi Prijedlog nove Odluke o radnom vremenu u određenim djelatnostima.

OPĆINSKI NAČELNIK

Hamdo Fatić